

Ifsiyōn

¹ Yih khat Paulus kī taraf se hai, jo Allāh kī marzī se Masīh Īsā kā rasūl hai.

Main Ifisus Shahr ke muqaddasīn ko likh rahā hūn, unheñ jo Masīh Īsā meñ imāndār haiñ.

² Kḥudā hamārā Bāp aur Kḥudāwand Īsā Masīh āp ko fazl aur salāmatī bakhsheñ.

Masīh meñ Ruhānī Barkateñ

³ Kḥudā hamāre Kḥudāwand Īsā Masīh ke Bāp kī hamd-o-sanā ho! Kyoñki Masīh meñ us ne hameñ āsmān par har ruhānī barkat se nawāzā hai. ⁴ Duniyā kī taḥlīq se peshtar hī us ne Masīh meñ hameñ chun liyā tāki ham muqaddas aur beaib hālat meñ us ke sāmne zindagī guzāreñ.

Yih kitnī azīm muhabbat thī! ⁵ Pahle hī se us ne faisla kar liyā ki wuh hameñ Masīh meñ apne beṭe-beṭiyāñ banā legā. Yihī us kī marzī aur kḥushī thī ⁶ tāki ham us ke jalālī fazl kī tamjīd kareñ, us muft nemat ke lie jo us ne hameñ apne pyāre Farzand meñ de dī. ⁷ Kyoñki us ne Masīh ke kḥūn se hamārā fidyā de kar hameñ āzād aur hamāre gunāhoñ ko muāf kar diyā hai. Allāh kā yih fazl kitnā wasī hai ⁸ jo us ne kasrat se hameñ atā kiyā hai.

Apnī pūrī hikmat aur dānāī kā izhār karke ⁹ Allāh ne ham par apnī poshidā marzī zāhir kar dī, yānī wuh mansūbā jo use pasand thā aur jo us ne Masīh meñ pahle se banā rakhā thā.

¹⁰ Mansūbā yih hai ki jab muqarrarā waqt āegā

to Allāh Masīh meñ tamām kāynāt ko jamā kar degā. Us waqt sab kuchh mil kar Masīh ke taht ho jāegā, khāh wuh āsmān par ho yā zamīn par.

¹¹ Masīh meñ ham āsmānī bādshāhī ke wāris bhī ban gae haiñ. Allāh ne pahle se hameñ is ke lie muqarrar kiyā, kyoñki wuh sab kuchh yoñ saranjām detā hai ki us kī marzī kā irādā pūrā ho jāe. ¹² Aur wuh chāhtā hai ki ham us ke jalāl kī satāish kā bāis baneñ, ham jinhoñ ne pahle se Masīh par ummīd rakhī.

¹³ Āp bhī Masīh meñ haiñ, kyoñki āp sachchāī kā kalām aur apnī najāt kī khushkhabrī sun kar imān lāe. Aur Allāh ne āp par bhī Rūhul-quds kī muhr lagā dī jis kā wādā us ne kiyā thā. ¹⁴ Rūhul-quds hamārī mīrās kā bayānā hai. Wuh hameñ yih zamānat detā hai ki Allāh hamārā jo us kī milkiyat haiñ fidyā de kar hameñ pūrī maḡhlāsī tak pahuñchāegā. Kyoñki hamārī zindagī kā maqsad yih hai ki us ke jalāl kī satāish kī jāe.

Paulus kī Duā

¹⁵ Bhāiyo, main Khudāwand Īsā par āp ke imān aur āp kī tamām muqaddasīn se muhabbat ke bāre meñ sun kar ¹⁶ āp ke lie Khudā kā shukr karne se bāz nahīñ atā balki āp ko apnī duāoñ meñ yād kartā rahtā hūñ. ¹⁷ Merī khās duā yih hai ki hamāre Khudāwand Īsā Masīh kā Khudā aur jalālī Bāp āp ko dānāī aur mukāshafā kī rūh de tāki āp use behtar taur par jān sakeñ. ¹⁸ Wuh kare ki āp ke diloñ kī āñkheñ raushan ho jāeñ. Kyoñki phir hī āp jān leñge ki yih kaisī ummīd hai jis ke lie us ne āp ko bulāyā hai, ki yih jalālī mīrās kaisī daulat hai jo muqaddasīn ko hāsil

hai, ¹⁹ aur ki ham īmān rakhne wāloñ par us kī qudrat kā izhār kitnā zabardast hai. Yih wuhī behad qudrat hai ²⁰ jis se us ne Masīh ko murdoñ meñ se zindā karke āsmān par apne dahne hāth biṭhāyā. ²¹ Wahāñ Masīh har hukmrān, iḳhtiyār, quwwat, hukūmat, hāñ har nām se kahīñ sarfarāz hai, ḳhāh is duniyā meñ ho yā āne wālī duniyā meñ. ²² Allāh ne sab kuchh us ke pāñwoñ ke nīche karke use sab kā sar banā diyā. Yih us ne apnī jamāt kī ḳhātir kiyā ²³ jo Masīh kā badan hai aur jise Masīh se pūrī māmūrī hāsil hotī hai yānī us se jo har tarah se sab kuchh māmūr kar detā hai.

2

Maut se Zindagī Tak

¹ Āp bhī apnī ḳhatāoñ aur gunāhoñ kī wajah se ruhānī taur par murdā the. ² Kyoñki pahle āp in meñ phañse hue is duniyā ke taur-tarīqoñ ke mutābiq zindagī guzārte the. Āp hawā kī kuwwatoñ ke sardār ke tābe the, us rūh ke jo is waqt un meñ sargarm-e-amal hai jo Allāh ke nāfarmān haiñ. ³ Pahle to ham bhī sab un meñ zindagī guzārte the. Ham bhī apnī purānī fitrat kī shahwateñ, marzī aur soch pūrī karne kī koshish karte rahe. Dūsroñ kī tarah ham par bhī fitrī taur par Allāh kā ḡhazab nāzil honā thā.

⁴ Lekin Allāh kā rahm itnā wasī hai aur wuh itnī shiddat se ham se muḥabbat rakhtā hai ⁵ ki agarche ham apne gunāhoñ meñ murdā the to bhī us ne hameñ Masīh ke sāth zindā kar diyā. Hāñ, āp ko Allāh ke fazl hī se najāt milī hai.

⁶ Jab ham Masīh Īsā par īmān lāe to us ne hameñ

Masīh ke sāth zindā karke āsmān par biṭhā diyā. ⁷ Īsā Masīh meñ ham par mehrbānī karne se Allāh āne wāle zamānoñ meñ apne fazl kī lā-mahdūd daulat dikhānā chāhtā thā. ⁸ Kyoñki yih us kā fazl hī hai ki āp ko īmān lāne par najāt milī hai. Yih āp kī taraf se nahīn hai balki Allāh kī baḅshish hai. ⁹ Aur yih najāt hameñ apne kisī kām ke natīje meñ nahīn milī, is lie koī apne āp par faḅhr nahīn kar saktā. ¹⁰ Hāñ, ham usī kī maḅhlūq haiñ jinheñ us ne Masīh meñ nek kām karne ke lie ḅhalaq kiyā hai. Aur yih kām us ne pahle se hamāre lie taiyār kar rakhe haiñ, kyoñki wuh chāhtā hai ki ham unheñ saranjām dete hue zindagī guzāreñ.

Masīh meñ Ek

¹¹ Yih bāt zahan meñ rakheñ ki māzī meñ āp kyā the. Yahūdī sirf apne lie lafz maḅhtūn istemāl karte the agarche wuh apnā ḅhatnā sirf insānī hāthoñ se karwāte haiñ. Āp ko jo Ḃhairyahūdī haiñ wuh nāmaḅhtūn qarār dete the. ¹² Us waqt āp Masīh ke baḅhair hī chalte the. Āp Isrāīl qaum ke shahrī na ban sake aur jo wāde Allāh ne ahdōñ ke zariye apnī qaum se kie the wuh āp ke lie nahīn the. Is duniyā meñ āp kī koī ummīd nahīn thī, āp Allāh ke baḅhair hī zindagī guzārte the. ¹³ Lekin ab āp Masīh meñ haiñ. Pahle āp dūr the, lekin ab āp ko Masīh ke ḅhūn ke wasīle se qarīb lāyā gayā hai. ¹⁴ Kyoñki Masīh hamārī sulah hai aur usī ne Yahūdīyoñ aur Ḃhairyahūdīyoñ ko milā kar ek qaum banā diyā hai. Apne jism ko qurbān karke us ne wuh dīwār girā dī jis ne

unheñ alag karke ek dūsre ke dushman banā rakhā thā. ¹⁵ Us ne sharīat ko us ke ahkām aur zawābit samet mansūkh kar diyā tāki donoñ gurohoñ ko milā kar ek nayā insān khalaq kare, aisā insān jo us meñ ek ho aur sulah-salāmatī ke sāth zindagī guzāre. ¹⁶ Apnī salībī maut se us ne donoñ gurohoñ ko ek badan meñ milā kar un kī Allāh ke sāth sulah karāī. Hāñ, us ne apne āp meñ yih dushmanī khatm kar dī. ¹⁷ Us ne ā kar donoñ gurohoñ ko sulah-salāmatī kī khushkhabrī sunāī, āp Ġhairyahūdiyoñ ko jo Allāh se dūr the aur āp Yahūdiyoñ ko bhī jo us ke qarīb the. ¹⁸ Ab ham donoñ Masīh ke zariye ek hī Rūh meñ Bāp ke huzūr ā sakte haiñ.

¹⁹ Natīje meñ ab āp pardesī aur ajnabī nahīñ rahe balki muqaddasīn ke hamwatan aur Allāh ke gharāne ke haiñ. ²⁰ Āp ko rasūloñ aur nabiyōñ kī buniyād par tāmīr kiyā gayā hai jis ke kone kā buniyādī patthar Masīh Īsā khud hai. ²¹ Us meñ pūrī imārat jur jātī aur barhtī barhtī Khudāwand meñ Allāh kā muqaddas ghar ban jātī hai. ²² Dūsroñ ke sāth sāth us meñ āp kī bhī tāmīr ho rahī hai tāki āp Rūh meñ Allāh kī sukūnatgāh ban jāeñ.

3

Paulus kī Ġhairyahūdiyoñ meñ Khidmat

¹ Is wajah se main Paulus jo āp Ġhairyahūdiyoñ kī khātir Masīh Īsā kā qaidī hūñ Allāh se duā kartā hūñ. ² Āp ne to sun liyā hai ki mujhe āp meñ Allāh ke fazl kā intazām

chalāne * kī khās zimmedārī dī gaī hai. ³ Jis tarah main ne pahle hī muḳhtasar taur par likhā hai, Allāh ne khud mujh par yih rāz zāhir kar diyā. ⁴ Jab āp wuh paṛheñge jo main ne likhā to āp jān leñge ki mujhe Masīh ke rāz ke bāre meñ kyā kyā samajh āī hai. ⁵ Guzare zamānoñ meñ Allāh ne yih bāt zāhir nahīn kī, lekin ab us ne ise Rūhul-quḍs ke zariye apne muḳaddas rasūloñ aur nabiyōñ par zāhir kar diyā. ⁶ Aur Allāh kā rāz yih hai ki us kī khushḳhabrī ke zariye Ġhairyahūdī Isrāīl ke sāth āsmānī bādshāhī ke wāris, ek hī badan ke āzā aur usī wāde meñ sharīk haiñ jo Allāh ne Masīh Īsā meñ kiyā hai.

⁷ Main Allāh ke muft fazl aur us kī qudrat ke izhār se khushḳhabrī kā khādim ban gayā. ⁸ Agarche main Allāh ke tamām muḳaddasīn se kamtar hūñ to bhī us ne mujhe yih fazl baḳhshā ki main Ġhairyahūdiyōñ ko us lā-mahdūd daulat kī khushḳhabrī sunāūñ jo Masīh meñ dastyāb hai. ⁹ Yihī merī zimmedārī ban gaī ki main sab par us rāz kā intazām zāhir karūñ jo guzare zamānoñ meñ sab chīzoñ ke Khāliq Khudā meñ poshīdā rahā. ¹⁰ Kyōñki Allāh chāhtā thā ki ab Masīh kī jamāt hī āsmānī hukmrānoñ aur kuwwatoñ ko Allāh kī wasī hikmat ke bāre meñ ilm pahuñchāe. ¹¹ Yihī us kā azlī mansūbā thā jo us ne hamāre Khudāwand Masīh Īsā ke wasīle se takmīl tak pahuñchāyā. ¹² Us meñ aur us par imān rakh kar ham pūrī āzādī aur etamād ke sāth Allāh ke huzūr ā sakte haiñ. ¹³ Is lie merī āp

* **3:2** Yānī khushḳhabrī sunāne.

se guzārish hai ki āp merī musībateñ dekh kar bedil na ho jāeñ. Yih main āp kī khātir bardāshht kar rahā hūñ, aur yih āp kī izzat kā bāis haiñ.

Masīh kī Muhabbat

¹⁴ Is wajah se main Bāp ke huzūr apne ghuṭne ṭektā hūñ, ¹⁵ us Bāp ke sāmne jis se āsmān-o-zamīn kā har khāndān nāmzad hai. ¹⁶ Merī duā hai ki wuh apne jalāl kī daulat ke muwāfiq yih baḥshe ki āp us ke Rūh ke wasīle se bātinī taur par zabardast taqwiyaat pāeñ, ¹⁷ ki Masīh imān ke zariye āp ke dilon meñ sukūnat kare. Hāñ, merī duā hai ki āp muhabbat meñ jaṛ pakareñ aur is buniyād par zindagī yon guzāreñ ¹⁸ ki āp bāqī tamām muḡaddasīn ke sāth yih samajhne ke qābil ban jāeñ ki Masīh kī muhabbat kitnī chaurī, kitnī lambī, kitnī ūñchī aur kitnī gahrī hai. ¹⁹ Khudā kare ki āp Masīh kī yih muhabbat jān leñ jo har ilm se kahīn afzal hai aur yon Allāh kī purī māmūrī se bhar jāeñ.

²⁰ Allāh kī tamjīd ho jo apnī us qudrat ke muwāfiq jo ham meñ kām kar rahī hai aisā zabardast kām kar saktā hai jo hamārī har soch aur duā se kahīn bāhar hai. ²¹ Hāñ, Masīh Īsā aur us kī jamāt meñ Allāh kī tamjīd pusht-dar-pusht aur azal se abad tak hotī rahe. Āmīn.

4

Badan kī Yagāngat

¹ Chunāñche main jo Khudāwand meñ qaidī hūñ āp ko tākīd kartā hūñ ki us zindagī ke mutābiq chaleñ jis ke lie Khudā ne āp ko bulāyā hai. ² Har waqt halīm aur narmdil raheñ, sabar

se kām leñ aur ek dūsre se muhabbat rakh kar use bardāsht karen. ³ Sulah-salāmatī ke bandhan meñ rah kar Rūh kī yagāngat qāym rakhne kī pūrī koshish karen. ⁴ Ek hī badan aur ek hī Rūh hai. Yoñ āp ko bhī ek hī ummīd ke lie bulāyā gayā. ⁵ Ek Ḳhudāwand, ek imān, ek baptismā hai. ⁶ Ek Ḳhudā hai, jo sab kā wāhid Bāp hai. Wuh sab kā mālik hai, sab ke zariye kām kartā hai aur sab meñ maujūd hai.

⁷ Ab ham sab ko Allāh kā fazl baḳhshā gayā. Lekin Masīh har ek ko muḳhtalif paimāne se yih fazl atā kartā hai. ⁸ Is lie kalām-e-muqaddas farmātā hai, “Us ne bulandī par chaḥ kar qaidiyon kā hujūm giriftār kar liyā aur ādmiyon ko tohfe die.” ⁹ Ab ḡhaur karen ki chaḥnī kā zikr kiyā gayā hai. Is kā matlab hai ki pahle wuh zamīn kī gahrāiyon meñ utrā. ¹⁰ Jo utrā wuh wuhī hai jo tamām āsmānon se ūnchā chaḥ gayā tāki tamām kāynāt ko apne āp se māmūr kare. ¹¹ Usī ne apnī jamāt ko tarah tarah ke ḳhādimon se nawāzā. Bāz rasūl, bāz nabī, bāz mubashshir, bāz charwāhe aur bāz ustād haiñ. ¹² In kā maqsad yih hai ki muqaddasīn ko ḳhidmat karne ke lie taiyār kiyā jāe aur yoñ Masīh ke badan kī tāmīr-o-taraqqī ho jāe. ¹³ Is tarīqe se ham sab imān aur Allāh ke Farzand kī pahchān meñ ek ho kar bālīgh ho jāenge, aur ham mil kar Masīh kī māmūrī aur balūghat ko mun'akis karenge. ¹⁴ Phir ham bachche nahīn raheñge, aur tālīm ke har ek jhoñke se uchhalte phirte nahīn raheñge jab log apnī chālākī aur dhokebāzī se hameñ apne jālon meñ phañsāne kī koshish karenge. ¹⁵ Is ke bajāe ham muhabbat

kī rūh meñ sachchī bāt karke har lihāz se Masīh kī taraf barhte jāenḡe jo hamārā sar hai. ¹⁶ Wuhī nason̄ ke zariye pūre badan ke muḡhtalif hisson̄ ko ek dūsre ke sāth joḡ kar muttahid kar detā hai. Har hissā apnī tāqat ke muwāfiq kām kartā hai, aur yoñ pūrā badan muhabbat kī rūh meñ barhtā aur apnī tāmīr kartā rahtā hai.

Masīh meñ Nāi Zindagī

¹⁷ Pas main̄ Ḳhudāwand ke nām meñ āp ko āgāh kartā hūñ ki ab se ḡhairimāndāron̄ kī tarah zindagī na guzāren̄ jin̄ kī soch bekār hai ¹⁸ aur jin̄ kī samajh andhere kī girift meñ hai. Un kā us zindagī meñ koī hissā nahīn̄ jo Allāh detā hai, kyon̄ki wuh jāhil haiñ aur un ke dil saḡht ho gae haiñ. ¹⁹ Behis ho kar unhoñ ne apne āp ko aiyāshī ke hawāle kar diyā. Yoñ wuh na bujhne wālī pyās ke sāth har qism kī nāpāk harkateñ karte haiñ.

²⁰ Lekin̄ āp ne Masīh ko yoñ nahīn̄ jānā. ²¹ Āp ne to us ke bāre meñ sun liyā hai, aur us meñ ho kar āp ko wuh sachchāi sikhāi gai jo Īsā meñ hai. ²² Chunāñche apne purāne insān ko us ke purāne chāl-chalan samet utār denā, kyon̄ki wuh apnī dhokebāz shahwaton̄ se bigartā jā rahā hai. ²³ Allāh ko āp kī soch kī tajdīd karne deñ ²⁴ aur nae insān ko pahan leñ jo yoñ banāyā gayā hai ki wuh haqīqī rāstbāzī aur quddūsiyat meñ Allāh ke mushābeh hai.

²⁵ Is lie har shaḡhs jhūt se bāz rah kar dūsron̄ se sach bāt kare, kyon̄ki ham sab ek hī badan ke āzā haiñ. ²⁶ Ḡhusse meñ āte waqt gunāh mat karnā. Āp kā ḡhussā sūraj ke ḡhurūb hone tak

ṭhandā ho jāe, ²⁷ warnā āp Iblīs ko apnī zindagī meñ kām karne kā mauḡā deṅge. ²⁸ Chor ab se chorī na kare balki ḡhūb mehnat-mashaqqat karke apne hāthoñ se achchhā kām kare. Hāñ, wuh itnā kamāe ki zarūratmandoñ ko bhī kuchh de sake. ²⁹ Koī bhī burī bāt āp ke muñh se na nikle balki sirf aisī bāteñ jo dūsroñ kī zarūriyāt ke mutābiq un kī tāmīr karen. Yoñ sunane wāloñ ko barkat milegī. ³⁰ Allāh ke muḡaddas Rūh ko dukh na pahuñchānā, kyoñki usī se Allāh ne āp par muhr lagā kar yih zamānat de dī hai ki āp usī ke haiñ aur najāt ke din bach jāenge. ³¹ Tamām tarah kī talkhī, taish, ḡhusse, shor-sharābā, gālī-galoch balki har qism ke bure rawaiye se bāz āeñ. ³² Ek dūsre par mehrbān aur rahmdil hoñ aur ek dūsre ko yoñ muāf karen jis tarah Allāh ne āp ko bhī Masīh meñ muāf kar diyā hai.

5

Raushnī meñ Zindagī Guzārñā

¹ Chūñki āp Allāh ke pyāre bachche haiñ is lie us ke namūne par chaleñ. ² Muhabbat kī rūh meñ zindagī yoñ guzāreñ jaise Masīh ne guzārī. Kyoñki us ne ham se muhabbat rakh kar apne āp ko hamāre lie Allāh ke huzūr qurbān kar diyā aur yoñ aisī qurbānī ban gayā jis kī ḡhushbū Allāh ko pasand āī.

³ Āp ke darmiyān zinākārī, har tarah kī nāpākī yā lālach kā zikr tak na ho, kyoñki yih Allāh ke muḡaddasīn ke lie munāsib nahīñ hai. ⁴ Isī tarah sharmnāk, ahmaḡānā yā gandī bāteñ bhī

ṭhīk nahīn. In kī jagah shukrguzārī honī chāhie.
⁵ Kyoṅki yaqīn jāneṅ ki zinākār, nāpāk yā lālchī
 Masīh aur Allāh kī bādshāhī meṅ mīrās nahīn
 pāeṅge. (Lālach to ek qism kī butparastī hai.)

⁶ Koī āp ko bemānī alfāz se dhokā na de. Aisī
 hī bātoṅ kī wajah se Allāh kā ḡhazab un par jo
 nāfarmān haiṅ nāzil hotā hai. ⁷ Chunānche un
 meṅ sharīk na ho jāeṅ jo yih karte haiṅ. ⁸ Kyoṅki
 pahle āp tārīkī the, lekin ab āp Ḳhudāwand
 meṅ raushnī haiṅ. Raushnī ke farzand kī tarah
 zindagī guzāreṅ, ⁹ kyoṅki raushnī kā phal har
 tarah kī bhalāī, rāstbāzī aur sachchāī hai. ¹⁰ Aur
 mālūm karte raheṅ ki Ḳhudāwand ko kyā kuchh
 pasand hai. ¹¹ Tārīkī ke bephal kāmoṅ meṅ hissā
 na leṅ balki unheṅ raushnī meṅ lāeṅ. ¹² Kyoṅki
 jo kuchh yih log poshīdagī meṅ karte haiṅ us kā
 zikr karnā bhī sharm kī bāt hai. ¹³ Lekin sab
 kuchh beniḡāb ho jātā hai jab use raushnī meṅ
 lāyā jātā hai. ¹⁴ Kyoṅki jo raushnī meṅ lāyā jātā
 hai wuh raushan ho jātā hai. Is lie kahā jātā hai,

“Ai sone wāle, jāg uṭh.

Murdoṅ meṅ se jī uṭh,

to Masīh tujh par chamkegā.”

¹⁵ Chunānche baṛī ehtiyāt se is par dhyān den
 ki āp zindagī kis tarah guzārte haiṅ—besamajh
 yā samajhdār logoṅ kī tarah. ¹⁶ Har mauqe se
 pūrā fāydā uṭhāeṅ, kyoṅki din bure haiṅ. ¹⁷ Is
 lie ahmaq na baneṅ balki Ḳhudāwand kī marzī
 ko samjheṅ.

¹⁸ Sharāb meṅ matwāle na ho jāeṅ, kyoṅki is
 kā anjām aiyāshī hai. Is ke bajāe Rūhul-quds se
 māmūr hote jāeṅ. ¹⁹ Zabūroṅ, hamd-o-sanā aur
 ruhānī gītoṅ se ek dūsre kī hauslā-afzāī kareṅ.

Apne dilon meñ *Ḳhudāwand* ke lie *gīt gāeñ* aur *naḡhmāsarāi* kareñ. ²⁰ *Hāñ*, har waqt hamāre *Ḳhudāwand* *Īsā Masīh* ke nām meñ har chiz ke lie *shukr* kareñ.

Miyān-Bīwī kā Tālluq

²¹ *Masīh* ke *ḵhauf* meñ ek *dūsre* ke *tābe* raheñ. ²² *Bīwiyo*, jis tarah *āp Ḳhudāwand* ke *tābe* haiñ usī tarah apne *shauhar* ke *tābe* bhī raheñ. ²³ *Kyoñki* *shauhar* waise hī *apnī bīwī* kā *sar* hai jaise *Masīh* *apnī jamāt* kā. *Hāñ*, *jamāt Masīh* kā *badan* hai jise us ne *najāt dī* hai. ²⁴ *Ab* jis tarah *jamāt Masīh* ke *tābe* hai usī tarah *bīwiyañ* bhī apne *shauharoñ* ke *tābe* raheñ.

²⁵ *Shauharo*, *apnī bīwiyoñ* se *muhabbat* rakheñ, *bilkul* usī tarah jis tarah *Masīh* ne *apnī jamāt* se *muhabbat* rakh kar apne *āp* ko us ke lie *qurbān* *kiyā* ²⁶ *tāki* use *Allāh* ke lie *maḵsūs-o-muqaddas* kare. Us ne use *kalām-e-pāk* se *dho* kar *pāk-sāf* kar *diyā* ²⁷ *tāki* apne *āp* ko ek *aisī jamāt* *peśh* kare jo *jalālī*, *muqaddas* aur *be'ilzām* ho, jis meñ na *koī dāḡh* ho, na *koī jhurri*, na *kisī* aur *qism* kā *nuqs*. ²⁸ *Shauharoñ* kā *farz* hai *ki wuh* *apnī bīwiyoñ* se *aisī hī muhabbat* rakheñ. *Hāñ*, *wuh* un se *waisī muhabbat* rakheñ *jaisī* apne *jism* se *rakhte* haiñ. *Kyoñki* jo *apnī bīwī* se *muhabbat* *rakhtā* hai *wuh* apne *āp* se hī *muhabbat* *rakhtā* hai. ²⁹ *Āḵhir* *koī bhī* apne *jism* se *nafrat* *nahīn kartā* *balkī* use *ḵhurāk* *muhaiyā* *kartā* aur *pāltā* hai. *Masīh* bhī *apnī jamāt* ke lie *yihī kuchh* *kartā* hai. ³⁰ *Kyoñki* ham us ke *badan* ke *āzā* haiñ. ³¹ *Kalām-e-muqaddas* meñ bhī *likhā* hai, “*Is* lie *mard* apne *mān-bāp* ko *chhoṛ*

kar apnī bīwī ke sāth paiwast ho jātā hai. Wuh donoñ ek ho jāte haiñ.” ³² Yih rāz bahut gahrā hai. Maiñ to us kā itlāq Masīh aur us kī jamāt par kartā hūñ. ³³ Lekin is kā itlāq āp par bhī hai. Har shauhar apnī bīwī se is tarah muhabbat rakhe jis tarah wuh apne āp se rakhtā hai. Aur har bīwī apne shauhar kī izzat kare.

6

Bachchoñ aur Wālidain kā Tālluq

¹ Bachcho, Ḳhudāwand meñ apne mān-bāp ke tābe raheñ, kyoñki yihī rāstbāzī kā taqāzā hai. ² Kalām-e-muqaddas meñ likhā hai, “Apne bāp aur apnī māñ kī izzat karnā.” Yih pahlā hukm hai jis ke sāth ek wādā bhī kiyā gayā hai, ³ “Phir tū ḳhushhāl aur zamīn par der tak jītā rahegā.”

⁴ Ai wālido, apne bachchoñ se aisā sulūk mat kareñ ki wuh ḡhusse ho jāeñ balki unheñ Ḳhudāwand kī taraf se tarbiyat aur hidāyat de kar pāleñ.

Ḡhulām aur Mālik

⁵ Ḡhulāmo, ḍarte aur kāñpte hue apne insānī mālikoñ ke tābe raheñ. Ḳhulūsdilī se un kī ḳhidmat yoñ kareñ jaise Masīh kī. ⁶ Na sirf un ke sāmne hī aur unheñ ḳhush rakhne ke lie ḳhidmat kareñ balki Masīh ke ḡhulāmoñ kī haisiyat se jo pūrī lagan se Allāh kī marzī pūrī karnā chāhte haiñ. ⁷ Ḳhushī se ḳhidmat kareñ, is tarah jaisā ki āp na sirf insānoñ kī balki Ḳhudāwand kī ḳhidmat kar rahe hoñ. ⁸ Āp to jānte haiñ ki jo bhī achchhā kām ham ne kiyā us kā ajr Ḳhudāwand degā, ḳhāh ham ḡhulām hoñ

yā āzād. ⁹ Aur māliko, āp bhī apne ġhulāmoñ se aisā hī sulūk karen. Unheñ dhamkiyān na deñ. Āp ko to mālūm hai ki āsmān par āp kā bhī mālik hai aur ki wuh jānibdār nahīn hotā.

Ruhānī Zirābaktar

¹⁰ Ek ākhirī bāt, Kḥudāwand aur us kī zabardast quwwat meñ tāqatwar ban jāeñ. ¹¹ Allāh kā pūrā zirābaktar pahan leñ tāki Iblīs kī chāloñ kā sāmna kar sakeñ. ¹² Kyonki hamārī jang insān ke sāth nahīn hai balki hukmrānoñ aur iḡhtiyār wāloñ ke sāth, is tārīk duniyā ke hākimoñ ke sāth aur āsmānī duniyā kī shaitānī kuwwatoñ ke sāth hai. ¹³ Chunānche Allāh kā pūrā zirābaktar pahan leñ tāki āp musibat ke din Iblīs ke hamloñ kā sāmna kar sakeñ balki sab kuchh saranjām dene ke bād qāym rah sakeñ.

¹⁴ Ab yoñ khare ho jāeñ ki āp kī kamr meñ sachchāi kā paṭkā bandhā huā ho, āp ke sīne par rāstbāzī kā sīnāband lagā ho ¹⁵ aur āp ke pānwoñ meñ aise jūte hoñ jo sulah-salāmatī kī ḡhushḡhabrī sunāne ke lie taiyār raheñ. ¹⁶ Is ke alāwā imān kī ḡhāl bhī uṭhāe rakheñ, kyonki is se āp Iblīs ke jalte hue tir bujhā sakte haiñ. ¹⁷ Apne sar par najāt kā ḡhod pahan kar hāth meñ Rūh kī talwār jo Allāh kā kalām hai thāme rakheñ. ¹⁸ Aur har mauqe par Rūh meñ har tarah kī duā aur minnat karte raheñ. Jāgte aur sābitqadmī se tamām muqaddasīn ke lie duā karte raheñ. ¹⁹ Mere lie bhī duā karen ki jab bhī maiñ apnā muñh kholūñ Allāh mujhe aise alfāz atā kare ki pūrī dilerī se us kī ḡhushḡhabrī kā rāz sunā sakūñ. ²⁰ Kyonki maiñ isī paighām kī

ḳhātir qaidī, hān zanjīroñ meñ jakaṛā huā Masīh kā elchī hūñ. Duā karen ki maiñ Masīh meñ utnī dilerī se yih paighām sunāūñ jitnā mujhe karnā chāhie.

Āḳhirī Salām

²¹ Āp mere hāl aur kām ke bāre meñ bhī jānanā chāheñge. Ḳhudāwand meñ hamārā azīz bhāī aur wafādār ḳhādīm Tuḳhikus āp ko yih sab kuchh batā degā. ²² Maiñ ne use isī lie āp ke pās bhej diyā ki āp ko hamāre hāl kā patā chale aur āp ko tasallī mile.

²³ Ḳhudā Bāp aur Ḳhudāwand Īsā Masīh āp bhāiyōñ ko salāmatī aur imān ke sāth muhabbat atā karen. ²⁴ Allāh kā fazl un sab ke sāth ho jo anmiṭ muhabbat ke sāth hamāre Ḳhudāwand Īsā Masīh ko pyār karte haiñ.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-30

PDF generated using Haiola and XeLaTeX on 22 Feb 2024 from source files dated 13 Dec 2023

123ff8cb-27b3-5817-a02a-22e67145fd30